

848 A 4



# KLOAREK KOAT AR RANNOU

IIA

## PENN-HEREZ KERZANTON.

---

Wardon : *Kurunen aour ha perlez ann Itron Varia Remengol*

**Karantez ha glac'har !!!**

I

Tud yaouank a Vreiz-Izel , didostait da glevet  
Ar recit eus va daëlou ha va foñiou kalet :  
Me so eur c'hloarek iaouank a eskopti Kemper  
Am boa choazet eur vestrez enn eskopti Treguer.

E c'harz ar mor oun ganet e bro sant Gwenole ,  
Ha biskoas nemet glac'har n'em euz bet em bue :  
Glac'har ha guir garantez , setu va flaneden ,  
Planeden rust ha kalet da heulia pen-da-ben.

Pa oan em bugaleach va mam baour aliez  
A lavare din : « Va mab , kar ha ped ar Werc'hez ,  
» Ped anez-hi , va mabik , ped Gwerc'hez Remengol ,  
» Mar he fedez a galon , biken ne di da goll . »

Patronez va mam dener , Gwerc'hez vad Remengol ,  
Pet gweach oe'h euz-hu miret na dounn me eat da goll !...  
Ho pedet am euz bepret... breman arok mervel ,  
E kaninn ho meuleudi d'am breudeur Breiz-Izel.

II

Pa gimiadiz dioc'h va zud , pa ziz pel eus ar ger ,  
Evit mont war ar studi e skolach Landreguer ,  
N'em boa nemet pemzek vloa , me a wele dourek ,  
Rag evidon ne voa ken , allaz , a eurustet.

## — 2 —

O tostaat oc'h Landreguer e kaviz eur plac'hik ,  
 Koant vel eun ælik Doue , he hano oa Metik ,  
 D'ar gouent e zea ive , evel d'on d'ar studi ,  
 He c'halonik oa mantret kement ha va hini.

« Salud deoc'h , plac'hik iouank , a lavariz dez hi ,  
 » Evel d'oun oc'h ankeniet o kuitat tud ho ti ;  
 » Ho tornik flour em dornik lakit gant karantez ,  
 » Hag e vezimp eurussoch o wela assamblez . »

Ar plac'hik a lavaraz : « O kloarek Gwenole ,  
 » Pedomp Doue aliez ann eil 'vit eguile ;  
 » Er joa koulz hag en anken d'alc'hit sonj a Vetik ,  
 » Euz a vreman da viquen e vo ho mestrezik . »

« O Metik , va c'harante , rozen gaér Breiz-Izel !  
 » War ho mignon Gwenole tolit breman eur zell ,  
 » Eur zell digant ho lagad a rai va euruslet  
 » Keit a ma lezo Doue achanon war ar bed . »

Erru e kear Landreguer , erru e penn hon hent ,  
 Me oe kaset d'ar skolach , ha Metik d'ar gouent ;  
 Ann disparti oe kalet , c'huero hag ankeniuz ;  
 Ann euruslet , er bed man siouas ! n'eo ket padus ! ...

Tre ma chomiz er skolach , skeuden dous Metik kez  
 Enn deiz , en noz dirazon a duec aliez ,  
 Neuze e peden Doue ha Sænt koz Breiz Izel  
 'Vit ma vije he bue laouen , eurus , santel.

## III.

Pa oe achu va studi ez iz da Remengol  
 Da bedi c'hoaz evit-hi Gwere'hez vad *Remed-oll* ;  
 Seiz tro a riz d'an aoter , devez ar pardon braz  
 Ha seiz tro d'ann Iliz sakr war benn va daoulin noaz.

Goude ann oferen bred , o pebeuz levenez ! ...  
 Er vered gant he mamm ger , e velis Metik kez :  
 Laouen oa evel ann deiz ha koant evel al loar ,  
 Biskoaz pen-herez ker koant n'euz bet war ann dovar.

Luguerni a re he zall , he diou chod gwen ha ru ,  
 He ginou , vel eur rosen , he bleo , he lagad du ,

— 3 —

Eur groaz aour en he c'herc'hen , he c'hoef dantelezet ,  
Lavaret 'vije eun ael euz ann èn diskennet.

- “ O ! pebeus joa evidomp , va c'hloarek Gwenole ,
- “ En em gnout e Remengol , deiz pardon Mamm Doue ,
- “ Mamm ann oll dud ankeniet , Gwenole , ma mignon ,
- “ Evidout , e peb amzer , he fediz a galon .
- “ Metik koant , setu aman , setu ar voalen aour
- “ A roaz d'in , arog meravel , Annaïk , va mamm baour ,
- “ Doug anez hi war da viz , kemer-hi digan-en ,
- “ Me dou war goalen va mamm d'az karet da viken .
- “ Ar groaz aour zo em c'herc'hen a vo did , Gwenole ,
- “ Eur guchen cuz va bleo du a roan did ive ;
- “ War ar groaz se e touan ha dirag ar Werc'hez
- “ E vi karet gant Metik 'tre ma vo e buez . \*

Ha daoulinet en Iliz , hon euz gred hor peden ,  
Ha roet evit offrants , eur c'houriz koar melen ,  
Binniget hor medalen , poket d'ar relegou ,  
Da relegou sàent Breiz , karet gant hon tadou .

Goude hon eus baleet hon daou dre Vreiz-Izel ,  
Ha guelet kals 'ilizou , kals a douriou huel ,  
Abbat Landevennek ha mor Douarnenez ,  
Lec'h ma oe beuzet kear Is hag ar princes Ahez .

Gwelet hon deus Mene-Hom , hag ilis veur Kemper ,  
Mene-Bre , ilis Bulat hag hini Landreguer ,  
Kastel Brest , Sant Ian-ar-bis , ilis Salaün ar foll ,  
Ha kaëra tour so er bed , tour huel Kastel-Pol .

Gwelet hon euz Ker-Ahez , Kemperle , Pont-n'Abat ,  
Fouenan , bro ar merc'hed koant , Gwengamp hag Huelgoad  
Montroulez ha Lann-Huon , Krozon ha Lez-n-even ,  
Kallak , bro ar gourinou , Kastel-lin , Rosporden .

Klevet on euz o krozal ar mor e beg ar Raz ,  
Biskoaz den n'hen tremenas eb santout aon pe c'hlaz ,  
Bet omp en enez Sizun , en Heussa , Molenez ,  
En evez Vaz , er Ieodet , ive er seiz enez .

## — 4 —

Eur bloavez omp bet eurus evel daou ael Doue ,  
 E pep lec'h , pa hor guelet , ann holl a lavare :  
 " Setu kloarek ar Rannou , soun evel eun derven ,  
 " Setu Metik , he vestrez , fresk evel eur rozen . "

## IV

Devez pardon sant Herbot , e kleviz eur c'helou  
 En euz beuzet va c'halon , en eur mor a zaëlou ,  
 Gant he zad ha gant he mamm d'am mestrezik Metik.  
 Ez oa choazet da bried eur pagan pinvidik.

Ar pagan ze oa diot , hep furnez hep skiant ,  
 Ne gare war ann douar nemet ar gwin-ardant ,  
 Metik paour pa er gwele a grene gant enkreiz ,  
 Hogen , he zud oa dallet , allas ! gant ann danvez ! ...

Mont a riz primm d'he gwelet neuze da Gerzanton ,  
 Dre ma tostaen em c'hereiz , e kreñv va c'halon ,  
 War dachen ar bourg o son e oa ar biniou ,  
 Tud ann eured ba Metik beuzet en he daëlou.

Metik , a dreuz he daëlou , a reaz ouz-in eur sel  
 En eur lavaret : " *Kouraj , Kouraj , mignon fidel !*  
 Monet a ra en ilis , lavart'ra d'ar belek :  
 " *Gwenole eo a garan , hag en vo va fried !* ...

Koueba reaz d'ann douar , raktal ar benn-herez ,  
 Ha douget e oe dioc'h-tu euz ann ilis er mez ;  
 Dispak he c'hoef , he dillat , ha dispak he bleo ;  
 Seblantout a re beza eun ælik paour maro.

Mantret oll gant ar glae'har e koueziz dann daoulin ,  
 En eur grial : " O Metik , sell a druez ouzin ! ... "  
 Pokat a riz d'he dornik , d'he diou chod , d'he c'herc'hen ;  
*O Metik ! Metik ! Metik ! Te p'hini a garien !* ...

Ann disesper en dro din , evel eur vantel blom ,  
 A gassaz pell a c'hanon , pell war zu Mene Hom ...  
 Va skiant a so kollet , va c'halon a so ien ..  
*O Metik ! Metik ! Metik ! Te p'hini a garien !* ...

Eiz de goude , asezet e kreiz koat ar Rannou ,  
 War va diou chod e rede diou feunteun a zaëlou ...

— 5 —

Pa glevis e Remengol o son ann anter-noz  
E lavaris esklamet : « Va Doue , deoc'h bennos !

- O Gwerc'hez sakr Remengol , sellit oe'h va glae'har ,
- Aman oun deut da verval brema war ho touar ,
- Vare'hoaz pa zavo ann heol arc'hantet en envo
- Dindan an derven goz ma , me vo kavet maro !!!...
- O Metik , va dousik koant , te p'hini a garien ,
- Kenavo 'lavarnn did er bed ma da viken !
- Gant ar maro unanet , ni c'hoaz en eum garo ,
- Kenavo er baradoz , kenavo , kenavo !!!...

## V

Ann de varlere'h , da zao heol , eun dorzunel hep par  
A hirvoude en derven he c'hlemou a c'hlae'har ;  
Ar c'hloarek a ioa maro , maro gant ann anken ,  
En eur lavaret : « *Metik te p'hini a garien !*

Ar c'hloarek paour a starde , c'hoaz war he vuzellou ,  
Kroas aour ha bleo du Metik , glebiet gant he zaëlou ;  
War ann derven n'doa skivet hano he garante ,  
Ha diou galon unanet treuzet gant eur c'hleze.

Kasset eo bet ar c'hloarek da vered Remengol ,  
Ha sebeliet e disheol ilis sakr Remed-oll ,  
Iliz Patronez he vamm en deuz bet ken karet !...  
Tud iaouank a Vreiz-Izel , pedit 'vit-han bepreat.

Setu eta Gwenole en he vele douar !!!...  
Eur Miz goude oe klevet huadanou glae'har...  
Eur plac'hik gwisket e da , e bered Remengol  
Deut di da bedi Doue ha Gwerc'hez Remed-holl.

O tremen dre ar vered , velaz war eur men be  
Skrivet neve flam hano he mignon Gwenole.  
Epad ann noz daoulinet , Metik wele dourek ,  
Ha d'ar men be e poke , e poke kalonek.

- O Gwenole , eme-z-i , setu te o repoz
- E douar sakr Remengol ez out dent d'am gortoz ,

## — 6 —

\* Mes kent ma tarzo ann de , o va muia karet ,  
\* Er be man , dre zorn Doue , ni vezo unanet !!!...

Da zao-heol eur belek koz , 'vont da bedi Doue  
He c'havaz anter-varo , gourveet war ar men-be ,  
Rei a raz d'ar plac'hik paour absolven ha pardon ,  
Metik a varvaz laouen , raktal , gant rann-galon !...

ENN EUR VOGEDEN EZANZENE GLÂN METIK KEZ ,  
'VEL EUR GOULMIK , A NIJAZ D'ANN ÈN GANT ANN ELEZ ;  
EOZ A VARADOS DOUE EUR GOABREN ARCHANTET ,  
WAR TOUR ILIZ REMENGOL , NEUZE , ZO DISKENNET.

WAR AR GOABREN AR WERC'HEZ HA SÄNT KOZ BREIZ-IZEL ,  
'DEUZ KURUNET GWENOLE HAG HE VESTREZ SANTEL ,  
BARZET ANN AMZER ZO BET , DRANT , WAR HO ZELENNOU  
DA ZOUE , E BREZONNEK , A GANE HO GWERSIOU.

SEBELIET E KORF METIK , KICHEN KORF GWENOLE ,  
AR MARO 'N DEOZ UNANET ANN EIL GANT EGILE...  
EUR C'HLOAREK KARANTEZOUZ 'N DEUZ WAR HO BE SKRIVET  
AR C'HOMZOU TRUEZOUZ MAN , GANT HE ZAËLOU MESKET :

\* *Aman e repos , e peoc'h , kloarek koat ar Rannou*  
\* *Den a feiz hag a galon , den a garie he vro :*  
\* *En e gichen eo kousket penn herez Kersanton ,*  
\* *Metik , ann ælik Douc , maro gant rann-galon !!!...*

O gwerc'hez vad Remengol , setu ho taou vuguel  
Kousket e tal hoc'h Iliz ha dindan hoc'h askel ,  
'Vel eur Vamm garantezouz war gavel he mabik ,  
C'hui dolo evez war be Gwenole ha Metik !!!...

Kleier , ograou Remengol , truezuz c'hui zono ,  
Barzet ha pelerinet , daëlou c'hui a skuillo ,  
War be Metik , Gwenole , pa rafet ho peden ,  
Eur beden a garante ha karget a anken !....

Bevit e doujanz Doue , tud iaouank Breiz-IZEL ,  
Pedit Gwerc'hez Remengol evit ma viot santel ;  
Sonjit ive e Metik , sonjit e Gwenole ,  
Bezit evel d'ho fidel ann eil d'eguile.

## — 7 —

Koat ar Rannou, (Rann, Rannou, chants, séries), *bois des chants ou des séries*. Koat bras e dero, a zo e kichen, ha dar zao heol da ilis Remengol. Ann Drouizet, beleien ar Vretonnet, gwechal e'hoas difeiz, a droc'he, bep bloaz, gant eur gontel aour, e koat ar Rannou, eul louzaouen, hanvet *huel-var*, p'hini a zao war ann dero.

Barz, barzet, (bardo, poète). Bep bloaz ive nem gave e koat ar Rannou hag e *Rumengoulou*, bizio hanvet Remengol, Barzet ann Arvor. Ar re ma a oa tud a skiant pere a gane gwersou great gant ho, war ann traou kaer erruet er vro, kana a rent ive meuleudi Teutatés. Doue faoz, p'hini a oa enoret el leac'h e ma brema iliz Remengol. D'ann hini vije hanvet Barz e roer eur gurunen dero hag eun delen aour, war p'hini ar Barz a gane he soniou.

Gwenklan, Marzin, Taliezin, a oa barzet e Breiz-Izel kent m'a tenaz en-hi ar feiz kristen. — Brema zo c'hoaz e Breiz kalz Barzet, pere laka ho studi hag ho soan evit kenderc'hel en hon iouez ar feiz ha iez hor bro, Er pen kenta eus ar barzet e ma ann aoutronez Kermarker, barz Breiz; ann abad Herri, barz ann Aviel; Troude; Kemar, person ha barz sant Laurans; ar Iann, barz koat ann Noz, Milin, barz Laouenan Breiz; Rannou, barz Roc'h Allaz; ar Skour, barz Itron Varia Remengol; F.-M. an Huel, barz Ker-ar-Born; Olier Souvelsr; barz Plouian; ann abad Poullaouek, kure Landevennek, barz sant Gwenole; Karis, person Plougras, barz Mene-Bre; Guernisson, barz Keravel, ha kalz a re all, pere o deuz gret eun niver bras a werziou ha soniou kaer.

- Kanit anez ho, Breiziz, rag beza int gwerziou
- Griet gant skiant ha kalon ha gant gwel vad komsou,
- Gret int e brezounek mad, nan e koz vrezounek,
- Evel ar re zo kalz re e brezonnek-gallek. »

Barzet ha pelerinet, kanit gwerziou santed,  
Kanit gloar ha meu'eudi da vamm tud Breiz-Izel,  
Ho Mamm hag ho Patrones. Rouanes ar bed oll,  
Mamm ann dud paour, ankeniet, *Gwerc'hez vad Remengol*.

## I.-P.-M. AR SKOUR,

*Barz I.-V. Remengol.*

PROPRIÉTÉ.